



**Observasaun HABADA kona-ba Nomeasaun ba
Komandante-Jeral no 2.^a Komandante-Jeral PNTL:
Violasaun Legal no Subversaun Ierarkia**

HALI BA DAME [HABADA]

Monitorizasaun no Advokasia ba Seguransa Komunitária no Governasaun Polísia

Rua: Tali Laran 1, Comoro, Dom Aleixo, Díli

Website: www.habada.org

Email: abelamaral75@gmail.com

+670 7745 4324

Data: 9 Abril 2026

Introdusaun

ONG HABADA ne'ebe akompaña besik ho atensaun maka'as kona-ba governasaun polísia nian no seguransa umanu iha Timor-Leste, hato'o públikamente preokupasaun kle'an kona-ba nomeasaun sira ba kargu Komandante-Jeral no 2.^a Komandante-Jeral Polícia Nacional de Timor-Leste (PNTL). Iha ne'ebe prosesu nomeasaun viola enkuadramentu legal, nomeadamente Estatutu Polísia nian (Dekretu-Lei N.º 35/2024).

Iha loron 25 fulan-Marsu tinan 2026, Ministru Interior hato'o ona proposta ba Konsellu Ministru kona-ba nomeasaun ba kargu aas liu iha instituisaun PNTL nian. Iha loron hanesan, Konsellu Ministru liuhosi Rezolusaun Governu N.º 13/2026 loron 26 fulan-Marsu nomeia Komisáriu-Asistente Afonso dos Santos ba kargu Komandante-Jeral no Komisária-Asistente Natércia Eufrásia Soares Martins ba kargu 2.^a Komandante-Jeral. Nune'e, iha loron 27 fulan-Marsu tinan 2026, ofisiais dirijente na'in rua ne'ebe temi iha leten simu pose, maski nune'e nomeasaun ne'e la-ho promosaun ka mantein iha postu Komisáriu-Asistente.

HABADA kompriende katak desizaun ida-ne'e hosi Governu, aleinde materialmente errada, legalmente la sustentável no representa hakiduk ida ba kotuk iha institucionalizasaun no profesionalizasaun PNTL nian, hodi hamosu presedente perigozu ida kona-ba subversaun ierarkia no legalidade demokrátika.

Violasaun Direta ba Dekretu-Lei N.º 35/2024

Nomeasaun ofisiais dirijente sira ho postu Komisáriu-Asistente ba kargu Komandante-Jeral no 2.^a Komandante-Jeral konstitui violasaun direta no klaru ba Dekretu-Lei N.º 35/2024, ne'ebe estabelese Estatuto das Policiais da Polícia Nacional de Timor-Leste.

Primeiru, nomeasaun ba ofisial ida ho postu inferior ka ki'ik liu atu komanda ofisiais sira ho patente aas liu kontradiz artigu 44, 45 no 46 Dekretu-Lei N.º 35/2024, ne'ebe regula ezersísiu kargu komandu no diresaun nian, ne'ebe presupoin ierarkia fungsional ida ne'ebe kompativel ho ierarkia postu sira. Iha ne'ebe artigu 44 difine kona-ba funsaun sira hodi exerse autoridade komandu nian hodi komanda, dirije, xefia, kordena, kontrola iha nivel estratéjiku, operacional no tátiku. Nune'e ofisiais sira ne'ebe dezempeña funsaun sira komandu, diresaun no xefia sira tenki tuir konteudu fungsional sira nia postu (artigu 45). Dispozisaun sira liu ba, reforsa hosi artigu 46 ne'ebe hatete klaru katak ofisiais polísia sira labele hetan nomeasaun ba pozisaun ne'ebe koresponde ba posu ida ne'ebe inferior ka ki'ik liu, nomós sira labele sai subordinadu ba sira seluk ho postu no antiguidade ki'ik liu.

Iha kazu ida ne'e, Komandante-Jeral no 2.^a Komandante-Jeral ho de'it postu Komisáriu-Asistente komanda mós ofisiais direjente sira ho postu aas liu ne'ebe sei ativu iha PNTL, Komisáriu-Jeral na'in-ida no Komisáriu na'in-haat ho antiguidade bo'ot liu. Entre sira ne'ebe sei ativu iha PNTL hanesan mós eis Komandante-Jeral no 2.^o komandante-Jeral (Komisáriu-Jeral Henrique da Costa hanesan eis Komandante-Jeral, Komisáriu Julio Hornai eis Komandante-Jeral, Komisáriu Faustino

da Costa hanesan eis Komandante-Jeral no eis 2.º Komandante-Jeral, Komisáriu Afonso de Jesus hanesan eis 2.º Komandante-Jeral no Komisáriu Pedro Belo hanesan eis 2.º Komandante-Jeral).

Tabela tuir mai ne'e hatudu kona-ba ierarkia, kareira, kategoria no konteudu fungsional sira hodi dezempeña funsaun no exersisiu ba kargu sira tuir dispozisaun artigu 38, 39, 44, 45, 46, 47, 48 no 127 Dekretu-Lei N.º 35/2024.

Kategoria	Subkategoria	Postu	Kargu no Funsau
Ofisiais	Ofisiais Dirijente	Komisáriu-Jeral	Komandante-Jeral
		Komisáriu	2.º Komandante-Jeral
		Komisáriu-Asistente	Inspetor-Jeral, Komandante Orgaun Superior Komandu no Diresaun, Komandante Unidade Especial Polísia (UEP).
	Ofisiais Superiores	Superintendente-Xefe	Komandante Komandu Rejional Oe-cusse Ambeno, Komandante Komandu Munisipal Tipu A, Komandante UPF, Komandante UPM, Komandante CFP, 2.º Komandante UEP, Diretor ensinu no seluk tan ho natureza ekivalente.
		Superintendente	Komandante Komandu Munisipal Tipu B, 2.º Komandante Komandu Rejional Oe-cusse Ambeno, 2.º Komandante Komandu Munisipal tipu A, 2.º Komandante UPF, 2.º Komandante UPM, 2.º Komandante CFP, Xefe Departamentu, funsaun asesoria, atividade inspesaun, ensinu no seluk tan ho natureza ekivalente.
		Superintendente-Asistente	2.º Komandante Komandu Munisipal tipu B, Komandante subunidade sira, Komandante Batallaun, Xefe Seksaun, funsaun asesoria, atividade inspesaun, ensinu no seluk tan ho natureza ekivalente.
	Ofisiais Subalternos	Inspetor-Xefe	Komandante Eskuadra Tipu A, Komandante kompañia ka estrutura hanesan, funsaun asesoria no tékniku, atividade inspesaun, ensinu no seluk tan ho natureza ekivalente.
		Inspetor	Komandante Eskuadra tipu A ka B, Segundu Komandante Eskuadra tipu A, Komandante Pelotaun ka estrutura hanesan, tékniku, ensinu no funsaun sira seluk ho natureza ekivalente.
		Inspetor-Asistente	Komandante Eskuadra tipu B ka C, Segundu Komandante Eskuadra tipu B, funsaun téknika, ensinu no funsaun sira seluk ho natureza ekivalente.
	Sarjentu	Sarjentu-Xefe	
		Primeiru-Sarjentu	
		Sarjentu	
Ajente	Ajente-Xefe		
	Ajente-Prinsipal		
	Ajente		

Segundu, sériu liu tan maka desrespeitu ba alinea a no b n.º 2 Artigu 127 Dekretu-Lei N.º 35/2024, ne'ebe klaru no la iha dúvida hodi estipula postu sira ne'ebe ezije hodi ezersísu funsaun kargu sira-ne'e:

- Komandante-Jeral da PNTL tenki ho postu **Komisáriu-Jeral**.
- 2.º Komandante-Jeral PNTL tenki ho postu **Komisáriu**.

Maibe Governu nomeia Komisáriu-Asistente na'in rua ba kargu Komandante-Jeral no 2.ª Komandante-Jeral PNTL, ida ne'e hatudu abertamente ignora lei, hodi koloka topu ierarkia polísia hosi ofisiais dirijente na'in rua ho de'it postu ne'ebe inferior ka ki'ik liu, duke buat ne'ebe lei ezije.

Los duni Dekretu-Lei N.º 35/2024 mós hatete Komandante-Jeral bele nomeia hosi ofisiais dirijenti sira ho postu Komisáriu-Jeral, Komisáriu no Komisáriu-Asistente no 2.º Komandante-Jeral bele nomeia hosi ofisiais dirijente ho postu Komisáriu, Komisáriu-Asistente no Ofisiais Superior ho postu Superintendente-Xefe (artigu 47 no 48). Maibe kuadru pesoal PNTL nian ho postu aas liu (postu Komisáriu-Jeral no Komisáriu) sei ativu iha PNTL. Nune'e nomeasaun Komisáriu-Asistente na'in rua ba Komandante-Jeral no 2.º Komandante-Jeral kontradiz ho artigu 38, 39, 44, 45, 46, no alinea a no b n.º 2 artigu 127 Dekretu-Lei N.º 35/2024 no Dekretu-Lei N.º 34/2024 Orgánika PNTL nian.

Terseiru, Governu nomeia ofisiais dirijente ida ne'ebe pasa ona ba situasaun apozentasaun (reforma) ba kargu Komandante-Jeral. Tuir alinea a) n.º 3 artigu 65 Dekretu-Lei N.º 35/2024 ofisiais dirijente sira ne'ebe pasa ba situasaun apozentasaun bainhira atinji ona idade 62 no ofisiais superior sira ho idade 60. Komisáriu-Asistente Afonso dos Santos ne'ebe nomeia ba kargu Komandante-Jeral PNTL ho idade 63 ka pasa ona ba situasaun apozentasaun. Bainhira membru PNTL ida pasa ona ba situasaun apozentasaun, tuir n.º 2 artigu 65 Dekretu-Lei N.º 35/2024 labele exerse funsaun sira iha ámbitu responsabilidade PNTL nian. Exetu iha sirkunstánsia exesional sira hanesan Estadu de Sítu ka Emerjénsia maibe labele atribui funsaun komandu, jestaun ka lideransa nian (artigu 66 Dekretu-Lei N.º 35/2024).

Imposibilidade ba Promosaun Imediata no Inversaun ba Ierarkia

Iha tentativa atu evita ilegalidade, Governu konsidera possibilidade atu promove nomeadu sira. Maibe, kona-ba pontu ida-ne'e Dekretu-Lei N.º 35/2024 la oferese espasu ba manobra, tanba nomeadu sira la prienxe rekizitu legal mínimo ba promosaun. Tuir artigu 130 no 131 Dekretu-Lei N.º 35/2024 hatete:

- Promosaun ba postu Komisáriu-Jeral mínimo tinan rua antiguidade iha postu Komisáriu.
- Promosaun ba postu Komisáriu mínimo tinan tolu antiguidade iha postu Komisáriu-Asistente.

Iha kazu ne'e, Komisáriu-Asistente Afonso dos Santos no Natércia Eufrásia Soares Martins hetan promosaun ba postu Komisáriu-Asistente iha loron 21 fulan-Marsu tinan 2026 (Despacho N.º 15/G-MI/III/2026), no tanba ne'e la prienxe rekizitu mínimo antiguidade ne'ebe hatuur iha lei ba

kualker promosaun iha futuru. Governu, bainhira nomeia sira, kria ona impase jurídiku ida ne'ebe hatudu, pelumenus, negligénsia hodi analiza kondisaun legal sira ka, piór liu, intensaun deliberada ida atu ignora lei.

Situasaun ida-ne'e hamosu inversaun ierarkia instituisaun nian. Governu koloka Komisáriu Asistente na'in-rua ba kargu Komandante-Jeral no 2.º Komandante-Jeral , nune'e la'os de'it komanda membru sira seluk hosi instituisaun (postu hanesan no inferior), maibe komanda mós ofisiais dirijente sira ho postu Komisáriu-Jeral na'in-ida no Komisáriu na'in-haat ne'ebe sei ativu iha instituisaun PNTL.

Iha lójika estrutura ierarkika nian, tantu militar ka polísia, prinsípiu fundamental ida katak ofisiais ida ho postu ki'ik liu (inferior) labele komanda ofisiais ida ho postu aas liu (superior). Porezemplu, iha militar postu Brigadeiru-Jeneral ida (fitun ida) labele komanda Major-Jeneral (fitun rua) ka Tenente-Jeneral (fitun tolu). Situasaun ida-ne'e, aleinde ilegal, disfuncional, la sustentável, no hamosu konfliktu internu ne'ebe hafraku kadeia komandu no dixiplina iha instituisaun polísia nia laran.

Konkluzau no Rekomendasaun sira

Ba HABADA, desizaun Governu nian ne'ebe materializa iha proposta Ministru Interior nian no hetan aprovasaun hosi Konsellu Ministru, bazeia ba kritériu sira ne'ebe laiha ligasaun ho interese públiku, meritokrasia, no legalidade. HABADA identifika problema bo'ot tolu ho desizaun ida-ne'e:

1. **Ilegalidade Material:** Nomeasaun ne'e viola norma esensial sira Estatutu Polísia nian (Dekretu-Lei N.º 35/2024), hamosu situasaun inkonstitusionalidade tanba violasaun ba prinsípiu legalidade (Artigu 2 Konstituisaun RDTL) ne'ebe vinkula órgaun Estadu hotu-hotu.
2. **Subversaun ba Ierarkia:** Koloka ofisiais ho postu ki'ik liu iha komandu superior sira (Komandante-Jeral no 2.º Komandante-Jeral), Governu la respeita PNTL nia estrutura ierarkia, hanesan pilar fundamental ba nia identidade nu'udar forsa seguransa. Aktu ida ne'e hafraku disiplina, koezaun interna, no autoridade lejítimu hosi komandante sira ne'ebe nomeadu.
3. **La respeito ba Profisionalizaun:** PNTL liu ona dalan naruk reforma no profisionalizaun nian, liu-liu hafoin krize 2006. Prosesu ida-ne'e ezije konstrusaun kareira ida bazeia ba antiguidade, kompeténsia, no respeito ba lei. Desizaun sira hanesan daudaun ne'e Governu foti representa pasu ida hakiduk ba kotuk, hodi submete instituisaun ba kritériu polítiku sira ne'ebe ameasa PNTL nia autonomia téknika no ninia kredibilidade iha públiku nia matan.

Iha situasaun ida ne'e, ONG HABADA nia misaun atu defende justisa, transparénsia, no estadu direitu, ezije koresaun imediata ba ilegalidade ida-ne'e. Tanba ne'e, HABADA rekomenda ba:

1. **Sua-Exelénsia Prezidente Repúblika,** kualidade nu'udar Xefe Estadu no Komandante Supremo Força Armadas nian, husu ba Governu atu prosede ho revizaun imediata ba

nomeasaun sira-ne'e, hodi bele restaura legalidade no ierarkia konstitusional no institusional.

2. **Sua-Exelénsia Primeiru-Ministru no Ministru Interior**, atu halo revizaun ba desizaun ne'ebe foti ona, hodi promove nomeasaun ida ne'ebe ho eskluзивu respeita Estatutu Polísia nian, nomeia ofisiais dirijente ho postu Komisáriu-Jeral ba kargu Komandante-Jeral no nomeia ofisiais dirijente ho postu Komisáriu ba kargu 2.º Komandante-Jeral PNTL nian, tuir lei haruka.
3. **Parlamentu Nasional**, nu'udar órgaun soberanu ne'ebe fiskaliza Governu nia atuasaun sira, atu bolu ho urjénsia Ministru Interior atu fó esklaresimentu kona-ba kritériu no legalidade ba prosesu nomeasaun ida-ne'e.
4. **PNTL** rasik, katak liuhosi nia órgaun fiskalizaun/inspesaun interna sira no ofisiais dirijente sira, firme nafatin iha prinsípiu legalidade no ierarkia nian.
5. **Provedoria Direitos Humanos e Justiça (PDHJ) no Deputadu sira Parlamentu Nasional** halo rekursu ba Tribunal Rekursu, hodi husu fiskalizaun abstrata ba konstitusionalidade Rezolusaun Governu N.º 13/2026 loron 26 fulan-Marsu kona-ba nomeasaun Komandante-Jeral no 2.ª Komandante-Jeral PNTL, bazeia ba Artigu 150 Konstituisaun RDTL.

PNTL nu'udar instituisaun fundamental ba estabilidade no pás iha Timor-Leste. Ninia lideransa labele trata hanesan troféu polítiku ida, maibe hanesan responsabilidade ida ne'ebe ezije adezaun rigorozu ba lei, esperiénsia, no integridade. HABADA sei kontinua akompaña didi'ak situasaun ne'e, ne'ebe konsidera nu'udar presedente perigozu ida ba futuru seguransa no demokrasia Timor-Leste nian, no sei la poupa esforsu atu garante katak legalidade no justisa prevalese.